



Farandula

pa ALDO PAULA



DISC JOCKEYS

E number disc jockey ta wordo usa masha hopi mes actualmente na e stacionnan di radio pa e locutornan cu ta simpatisa cu e musica moderno. Pa'mi esaki ta injustamente, pasobra segun mi por a bin comprende "al correr de los años", despues di a lesa hopi literatura concerniendo farandula y radio difucion en particular, cu un disc jockey mester tin cierto cualidades. E mester ta primeramente un bon locutor, e mester por entrevista debidamente un artista y e mester conose e mundo farandulero a fondo. E ultimo dos cualidades no mester straña niun hende, pasobra un dee-jay su funcion ta mas informativo cu deleitoso, informativo ariba e ramo disquera.

E DJ mester aparte di presenta e disco nobonan, informa su publico oyente di tur e ultimo sucesonan ariba e escenario disquera, manera kico asina ta pasando cu artistanan o cua rumbo asina e musica tin idea di tuma, compila top-hits, y naturalmente pega disconan cu segun e ta bon.

Si nos waak bon na Aruba e disc-jockeynan cu tin ta masha poco, esey ta si nos huzga nan segun loke mi a bisa prome. E deejaynan cu tin pa'mi e ora ta Corpus Christie di Carina y Milo Ras di Kelkboom, anke cu na mi parecer Corpus ta imitando un dj di e popular radio di Miami WJBS, pero un cos pami ta visto cu e ta miho aki na Aruba. Un cos ta lastima cu su programa ta asina laat anochi. Milo Ras tin e programa Universal Top-Disco y Flashbacks, entre 4 y 6, e ta duna hopi background information, e tin un variacion grandi di disco, bo por tende hopi disco, cu pa nos ta straño, cu ta ariba e top-hits mundialnan. Como locutor si mi no ta hañe bon, e por ripiti cada rato mes un cos, pero otro moda bisa, yen di biaha trey otro y otro foutnan chikito cu ta acumula y cu ta hasi cu no ta tur ora bo por disfruta di su programa loke ta lastima, paso e ta realmente vale lapena. Locual nos tin actualmente ta animadornan, e miho nan ta sin duda algun, Lauchi, Flodo y Scorpio, e ultimo aki pa varios aña caba ta wordo escogi e miho disc-jockey. Cada un tin un propio estilo y cada un tin un sintonia grandi, y nan influencia ariba e otro locutornan ta enorme, tin ora ta asina visto cu un locutor ta imitando nan pero niun di tres ta na mi parecer disc-jockey. Anke cu nan tin e prome exigencia, sin duda algun, e biahnan cu nan ta duna info bo por contanan ariba bo dede.

Tin varios locutor cu tin e posibilidad di bira bon disc-jockeys y cu a demostra esaki caba; Juan Carlos Gil, Disc Panty, Aldric Croes, y Ivan Kelie. E prome nos sa cuta conose e mundo farandulero hopi afondo, poco poco e ta bira un bon locutor y su poder pa pega un disco ta enorme, nos tur por corda con e a pega e cancion ya biew caba di BeeGees "Sweet Voices". E di dos Disc Panty nos a ripara cu e tambe por pega disco, e tambe ta conoce e mundo farandulero bon y tin ora tambe e ta duna su oyentenan info ariba e ultimo sucesonan farandulero, e ta un di e poco nan cu por entrevista un artista mas halto cu e average di e otronan, pero algo cu su mi mester menciona ta cu e ta papia un tiki mucho hopi. Hopi hende sigur ta bula awor y bisa cu ta mi ta contradiciendo mi mes, pasobra si bo mester duna informacion bo mester papia hopi y mi ta bisa no pasobra ta eynan e arte di locucion ta sinta, contrario cu di un politico, bisa lo mas posible den menos cantidad di palabra posible. Y si Aldric y Ivan tuma e puntonan cu mi a bisa prome na serio nan por bira e mihonan di Aruba, e palabra clave ta 'perfecciona' bo mes.



"Juan Carlos Gil, poco poco un bon locutor".